









LA
RESPONSE

FAITE A MAISTRE

GVILLAVME, TOV-

CHANT LE SOLDAT

François.

Dulce est desipere in loco.

M. DCV.

Case

F

39

326

A I

16 05 25

RESPONSE

FRANÇOIS

THE NEW YORK

LIBRARY

FRANÇOIS

FRANÇOIS

W. DON



RESPONSE FAITE A MAISTRE GVIL- laume.

MON bon amy, ayant
sceu que vous aüiez
fait mettre en lumiere
la response au Soldat
François, l'ay laissé
aux champs ma fem-
me & mes enfans, &
la charuë au milieu du gueret pour venir à
Paris, desireux de voir vostre bel œuvre: L'on
fit defense au Palais de ne le vendre point,
l'en pleurois desia de tristesse, voyant qu'on
vouloit enseuelir vostre gloire dans l'ou-
bly: & de fait, on fit boëtter, emmagasiner,
encoffrer, ensaquer, emballer vostre mé-
moire: La voila bien cachée, puis que tout
le monde en rit. On la vouloit supprimer,
vous qui estes digne de la mesme renom-
mée que le cheurier de Nismes. Un mien
amy me communiqua vostre œuvre. Pour
les coutellieres que vous dites, elles ne croi-

sent que par les Palais des grands Rois.
 Quant à monsieur de Sauoye, il n'en a point
 à la terre : car les gaires de son pays sont de
 raues, ou de refors. Qu'il n'aye de moyens,
 si a : tesmoins les presens qu'il fit à Paris, &
 ceux qu'il fit iadis en Prouence. Et puis il a
 quelque tribut du Peru. Ladite manuelle
 depend vrayement de ceux que vous dites.
 Et ja à Dieu ne plaise qu'elle se deriue de la
 fantasticante & alambicatiue furie de vostre
 ennemy. Maistre Iacques le Iaquemart, le-
 quel avec son espée veult trécher les nuées,
 & mettre la terre sous ses pieds, menasse les
 deux poles pour les faire trembler. Le Gou-
 uerneur de ceste Boussole n'a point besoin
 d'estre abbreuue d'un bouillon de Chappon,
 meslé avec le fromage d'Auvergne. Je sçay
 bien que si les Rochelois, Montaubannois ;
 & monsieur de Geneue, seant sur la chaire de
 l'Eglise pretendue & reformée, touchoit
 ceste corde, qu'il nous toucheroit vn re, mi ;
 fa, sol, la, plus allegre que celuy qu'on chante
 à nostre Dame, pour luy & les siens, mais
 non pas pour nous, & feroit plus que ses pre-
 decesseurs : car il feroit honorer les festes
 des Saints, sur tout la saint Barthelemy.
 Voila pourquoy, Maistre Guillaume mon
 amy, vous auez bien philosophé : & ie co-
 gnois, que vous auez plus d'entendement
 dans les ongles, qu'à la pointe des talons.
 Quant à vostre voyage de Gourmandie, ie
 ne m'y trouua iamais. Toutesfois, ie sçay

bien que l'on ne pouuoit faire au Roy vn
 plus beau present que de M. Guillaume.
 Vous estes digne pour le moins d'une bon-
 ne toque tous les ans, & d'un fayon de Suisse:
 car vous- vous estes tellement trauaillé, qu'a-
 uez pensé perdre les semelles de vos sou-
 liers apres chiens, chats, souris, & lieures.
 Au reste, si l'on enseignoit la doctrine de
 Pythagore, & qu'on la creust, ie dirois qu'en
 vous est venue l'ame de Nostradamus, par
 la Metempicose, puis que vous estes si grand
 Astrologue, que vous prophetisez toutes
 choses passées, & mesmes futures, si vous
 voulez: comme, que nous deuons tous mou-
 rir. Et gare qui ne sera bon Catholique, &
 ne sera bien confessé, ou pour le moins con-
 trit de ses pechez. Dites hardiment, qu'il
 nous faudra tous estre iugez de Dieu, & qu'il
 faudra à Carême-prenant danser les Mac-
 cabrées. Conseruez-vous Maistre Guillau-
 laume, & n'imites ne Aristote, ne Dion, ne
 Pline, mais cedez au temps, aux affaires, &
 aux personnes, en mesnageant tousiours
 bien les affaires de vostre maistre, & conti-
 nuez: Moy qui ne veux m'arrester à vostre
 Responce, sinon comme le chat sur la braise,
 & comme les chiens d'Egypte dans le Nil,
 pour raconter les grands faits de Monsieur
 vostre bon amy, & les vostres: car i'en suis
 indigne & inepte. Touchant vostre mattoi-
 zerie, elle ne vous est reprochable: parce
 que vous faites comme dit le Pedagogue de

l'Euangile: Soyez simples comme Colombes, & prudens comme Serpens. Gardez de mordre, Maistre Guillaume, vous avez donné vne dementie, gardez qu'il ne vous faille aller rendre raison à l'estecade: toutesfois ils respondent en Italien, *Non la voiglo.* Que vous ayez empesché les pescheurs. Mon amy à pescher, peche en eau trouble durant ces dernieres guerres. Ma foy excusez-moy, s'il vous plait. Ecrivez-en vn peu vne lettre à celuy qui est en mesme rang auquel vous-vous seignez (sans vous desplaire) chez le Pedagogue de Monsieur de Sauoye, il s'appelle Mingala: & demandez-luy les beaux barbeaux, carpes, truittes, anguilles, brochets, qu'ont pesché aux ruisseaux de toute la France, tant de petits grâds Gentils-hommes: tesmoin en est celuy, lequel a fait faire cinq cens piques de nouveau, & tant de halebardes, & mousquets, lequel amasse tant de poudre, fait faire tant de boulets: il est resolu de demeurer dans Orange, ou mort, ou vif. Quelqu'vn de leur mesme farine, vn fin frotté, vn fin rusé, vn fin madré, me disoit dernièrement, venant des Antipodes renuerséz, de Calicut, & du pays de Coucagne, où n'y a qu'vne rüe, maisons deçà, maisons delà. En vn costé n'y a que tonneaux, à l'autre que rotisserie: & quand on a mangé vn plat d'alioüettes, elles reuiennent encores toutes rosties, les hautes chambres sont pleines de lits: C'est le pays

où tombent les benedictions du peuple d'Israel. Le bon pays pour le Soldat: Ce bon Madré disoit, ô si Monsieur de Nansau pouuoit assieger la principale ville de sa principauté, ô que nous aurions des doublons d'Espagne. Et Dieu sçait le bon mesnage que nous luy ferions. Maistre Guillaume mon amy, ie croy que tu aurois ja perdu ta cause, si tu plaidois deuant deux fripons, qui disoient que le Roy mesme auoit fait imprimer le Soldat, ou Monsieur le Comte de Soissons. O les gros maraux, ô les gros badaux, ô les truans, durg-beccs, cagnars, larrons, voleurs, brigands, dans vn cabaret, aupres du feu, de la bourse des marchands, & du pucelage des filles. Il est vray que là on n'en fait pas scrupule, ils veulent multiplier pour auoir à force gens à se defendre. Il n'y a pas long temps de cecy. C'estoit à mon retour de Sardaigne, où i'auois trois vaisseaux chargez de bardots, muletins, anichons, que i'ay fait venir à Paris: Parce que plusieurs de ces messieurs les courtisans, quand ils veulent marchander les marchandes, ne mettent point pied à terre pour cela, ils entrent dans les boutiques à cheual. Je crains de faire diggression. Monsieur d'Oranges à present ne veut rien laisser sortir. Hé pauvres muletiers, lesquels voulans sortir du vin, furent chargez à bons coups de bastons: Pour peage ils laisserent, & le vin & l'argët. Quelqu'un s'en va y porter trois ou quatre mulets

chargez de vessies, & de marsepains de nouvelles de la Cour. Dieu le conduise en bien faisant. M. Guil. vous semblez la mere d'E-uandre, à déchiffrer le secretaire de Monsieur de Villeroy. Les láciers d'Albanie ne se trou-ueroient pas bien en France: Car les Boëmes, lesquelles courent le pais, ont enseigné à nos Messieurs de Nogent & Chasteleraut, à les faire de bonne trempe, bien larges, pointus & trenchants, pour couper toutes ces lances. Dieu nous garde donc d'une telle gendarmerie: Car nous serions plustost à la fin du monde en Sodome & Gomorrhe, que nous ne voudrions. J'ay fait autre-fois de grands voyages. Sur tout iusques à l'Eglise S. Paul de Paris, deçà la Bastille, pres la ruë S. Anthoine, non gueres loing de la Seine, mais par là à l'environ sept ou huiet cens lieuës, contemplant le clocher de S. Paul, ie me pensa que quelque graueur auoit prins la forme du laquemart de l'Horologe, Les Italiens appellent cela *spruenta veigliaco*, ou bien *spruenta sso di fazuoli*. Au lieu de l'espée lui eusse fallu mettre vne fauche. O le beau embleme.

Vostre reuelation M. Guil. a bien prophetizé tout ce que nous auons veu. Car & l'on pendoit les gens par les puits, l'eau iusques à la bouche, & iusques aux yeux, pour les faire rançonner. A quelques autres on billoit la tefte, iusques en faire sortir les yeux, à autres on creuoit le ventre. On mettoit des bastons

entre les doigts, puis on les pressoit. On leur attachoit les mains derriere le dos & les iam-
 bes, puis les faisoient coucher en terre. Pen-
 sez qu'on faisoit à leur femmes, pensez com-
 me on fouilloit les coffres ? Feu Monsieur de
 la Vallette combien de noyers fit-il abbattre,
 non pas à coups d'aches, mais à faix de pau-
 ures pendus ? Combien de filles violées, de
 maisons saccagées, & de sacristies volées,
 & de temples ruinés ? Si Monsieur vostre
 bon amy, M. Guil. se promenoit vn peu par
 ces cartiers vers le Mont-lymar, combien
 verroit-il de sainctes reliques ? Les estrangers
 que n'ont-ils faits Messieurs les Neapoli-
 tains ? lesquels ie crois estre descendus de
 Loth, ou pour le moins estre sortis de Sodo-
 me, & Gomorrhe, deuant qu'elles abimas-
 sent long temps auparauant. Car ils ne se
 contentoient pas prendre les femmes viues,
 mais abusoient encores des mortes. Cela ne
 suffisoit, il falloit se seruir des chieures, & des
 iumeuts. Le sexe masculin n'a seulement ce
 vice, mais encores le feminin vers ces car-
 tiers. Lisez seulement l'histoire de ceste fille
 de Messine, & du Cinge. Et apprenez que ce
 n'est pas ainsi qu'il faut viure en ce mode. M.
 Guil. mon amy, ie n'entends rien à la suite de
 vostre discours: car ie suis si grossier, que d'or-
 dinaire ie ne me melle que de mes petis affai-
 res, de ma charruë & de mes bœufs, & de mes
 vaches. Ie ne suis ne harquebusier à cheval,
 ne à pied, ne Halebardier, ne Arbalestier, ne

Suisse, ne Escossois, ne Lansquenet, ne Gendarme, ne Aduocat, ne Theologien, ne Philosophe, ne Medecin, ne Grammairien. Si est-ce que ie participe de tout par droit de nature. Je suis fort ambitieux : Mais ie ne puis parler au Roy. Quand ie va au Palais, ie ne porte point de panache. Voila pourquoy ie ne suis pas bien venu, & i'en ay bien raison de n'en porter point. J'auois peur de faire comme Icarus. Au reste ces Messieurs les Halebardiers, ou gardeurs des chambres, me refusent à tous propos la porte, & ie m'en va, car ie suis vn peu impatient. Puis ie me promene par le Louure, en attendant que le Roy sorte pour luy faire compagnie iusques en quelques Eglises. Là où ie prie Dieu pour luy, pour la Royné, pour Monseigneur le Dauphin, & pour la paix; & que Dieu leur donne encor à chacun bonne vie & longue, avec vne filace d'enfans. Et puis bon iour & bon an, Dieu vous comment : Quant à ceux qui desfroberent la Coupe d'or, & les Perles, me font esmerueiller. Car ie pensois que la vertu de desfrober, fut seulement pratiquée en Angleterre : Là où quelques Gentils-hommes mesme passent Bacheliers, & maistres es arts en telle science. Celuy que vous dittes M. Guil. qu'il fut pendu, ie voudrois scauoir s'il fut pendu par les pieds, ou par la teste? vous ne vous expliquez pas bien, M. Guil. D'auantage ie demande : la chaudiere du mauuais Riche où il fut porté, est-elle de

beurre, ou de cire? Car Messieurs nos Theo-
 logiens, & Messieurs les Ministres, ne veu-
 lent point de tels instruments au Royaume
 de Pluton, & de Proserpine: Et quand on le
 grilla fit on point de saulcisses de ses boyaux?
 Je voudrois bien voir quelqu'un qui fut venu
 de ceste terre incognüe, auquel à la verité
 on demanderoit bien de nouvelles. Je crois
 qu'il parleroit Latin: mais ie ne l'entends
 point. Je n'entends pas mesme la Chicane, &
 dis *transeat*. Ha vertu bleu! l'entends plus du
 latin que les asnes de village, & mesme que
 ceux de Paris. C'est par coustume: Quand ce
 Soldat se mesle de parler des amours de Mō-
 sieur le bon amy de M. Guil. il semble qu'il
 aye la pisse chaude. C'est bien à luy de mesler
 telles cartes. Il ne sçautoit mesme iouier à
 l'homme; comment iouera-il le Soldat? En
 cest acte si miraculeux, & si heroique, qui luy
 arriua vers l'hostel de Dame Conchine, il fit
 tout de mesme que font ceux qui n'ont aupara-
 uant iamais esté à la guerre, lesquels au
 moindre coup de pistolet courbent la teste,
 & encores qu'ils ne soient blesez, faut pas
 moins que le Chirurgien les visite. En vostre
 liure M. Guil. intitulé la Responce au Soldat
 François, *capite de xrinis*. Vne seruante pen-
 sant que ce Soldat fut quelque marchand de
 peau d'Anguilles, ou de Veaux pour en faire
 de gaines, luy arroula sa teste. O le pau-
 vre homme, il pensoit ja estre mort! Et
 le voyla bien habile pour la guerre.

Quelle furie François! Alors il luy eusse fallu faire de l'eau beniste, pour luy faire euacuer les diables qu'il a dans le corps. Et ce fut esté le meilleur Antidote que monsieur de Laurens luy eusse peu ordonner. Mais parlant à bon escient: Si cela est, la seruante deuoit payer les habits.

Je ne sçay, Maistre Guillaume, si vous entendez le Soldat, quand vous dites, cocu, conard, au diable, Soldat comme vne vache, gend'arme comme vn fagot. A ce propos, le iour de Pasques, l'an 3000. passant par-deuât le College de Sorbonne, c'estoit de bon matin, ie trouua vn paquet de diuerses predication^s anciennes, modernes: entre-autres choses, ie trouua ce que s'ensuit. Quant à moy, ie croy que quelqu'vn de ses Messieurs vouloit faire vne inuectiue, vne oraison, ou vne predication à l'encontre de ce pauvre Soldat, tant il est aymé d'vn chacun. Voicy où cela commence.

O Soldat, nō pas és armes ne à l'espée, mais Soldat de furie, de langue, & de plume. Nous auons bien sçeu cognoistre par le lustre de ton œuure, tes desirs, tes volontez, tes appetis, & les motions de tes passions. Tu nous chantes vne guerre: Et

quoy ! Ne nous veux-tu point enre-
gistrer, & enrooller avec les esca-
drons du Roy des Prouinces, ennemy
capital des humains, Antagoniste de
Dieu. Va grenouille importune de nô-
tre doux sommeil, corneille de male-
diction, graille de miseres & cala-
mitez. N'entendons-nous pas bien la
voix de ta langue viperine ? Voix, sot
meuglement. O S. asne de Balaan, ô
Rossignol harmonieux, qui s'est meta-
morphosé en pie babillarde, oye criar-
de, grue bruyarde, chien abbayant. Va
cocu infortuné, corbeau de presages fa-
taux, presage sans foy ! Va cygne qui
chantes ta mort, si tu n'estois caché
entre les paluds de ie n'ose estre des-
couuert, mais aussi bien cygne de
la mort, de braues François, si nous
obeissions à tes forcenées remonstran-
ces. Tu as fait cognoistre ta voix le
chant d'un Coq sinistre, le sifflement
d'un basilic. On t'a iugé resueille-ma-

Tonnerre de mal-encontre. Tu t'es fait voir, ô Soldat, porte-enseigne du diable, boute-feu d'inimitiez, meche de perdition, poudre d'inquietude, esclat d'une infinité de mal-heur. Les yeux d'un chacun te voyent. Comette execrable, Phare d'arrogance, flambeau d'impostures. Les aveugles mesmes te recognoissent marque de faulseté, monnoye adulterine, gravée du nom de justice, pour pallier ton impudence, & ton enuie. Tu t'es acquis des tiltres dignes de remarque, Viceroy des furies d'Enfer, Ambassadeur de Megere, Capitaine des desesperes, Soldat pour du pain. Et qui est-ce qui ne t'a iugé sponge & sang-sue, non tant du sang des Espagnols, que des doublons d'Espagne? Hydropique de l'or du Peru, & des honneurs que tu desires acquerir. Et qui ne t'a condamné Forgeron des tumultes? bellier contre le saint mur de la paix, forte-

tin du tant gracieux, & du si long
 temps, desire repos, pour nous faire
 tous esgorger les vns les autres une
 autrefois. Tay-toy oracle du diable,
 Sorbaquane de l'Enfer, Soufflet de se-
 dition, Cloche d'alarmes, Tocche sain
 pour les temeraïres, Horloge de mu-
 tinations, Orgue de detractions, &
 de medisances. Tay-toy pseudopro-
 phete, cornet des esclandres inhu-
 mains, Trompette de l'effusion du
 sang humain. Cesse ton son, tabour de
 funestes calamitez, fiffre de desola-
 tion, truchement des ennemis de la
 France, du Roy, & de la Royne, &
 de Monseigneur le Daulphin. Tes
 medisances ne sont que voix d'Echo,
 effouuentail pour les mouscherons, la
 lime des gens de bien, que tu veux
 mordre avec tes dents d'ivoire. Tu te
 fais entendre par tes beaux docu-
 ments: un Canon de rage canine, Pe-
 tard d'impudence, Foudre de cholere,

resse des loix, mere nourrice des alli-
 ces, alliance des infractions, anneau
 de la foy & des serments entre les
 Princes, reparation des ruines, soulas
 des desolez, secours des affligez, nef
 de fertilité & d'abondance, sainte
 tutrice du droit diuin & humain, &
 en vn mot mere conseruatrice de nos
 vies. Va donc porteur d'exécrables
 & deplorables nouuelles, relateur des
 conspirations que le diable & ta per-
 fidie esueillent contre nous. Vn qui-
 dan pour se rendre memorable à la
 posterité, embrasa le temple d'Ephese.
 O Soldat, as-tu point esté poussé d'un
 mesme esguillon, nous voulant tous
 exposer es flammes de la guerre, &
 cest estat, par la grace de Dieu si pa-
 cifique. Si nostre bon Roy eusse entre-
 prins telle guerre par tes infernalles
 persuations, & qu'il eusse eu favora-
 ble le bras du Dieu des armées. O
 que tu eusses bien fait voir au fron-

tiffice de ton liure ton nom, en lettres rouges, ou en caracteres d'or. O que tu eusses eu de complices, qui eussent anagrammatizé sur ton nom, & t'eussent esleué iusques au firmament. Que si le sort fut esté contraire, faignant publiquement l'Heracлите, priuément fusses esté vn Democrite. Et par ainsi tu eusses tousiours acquis quelque gain. Mais n'attends autre dorefnauant, ou qu'vn oubly perpetuel, ou qu'une infamie inexpiable.

CE pauvre Soldat, il fait comme vn loup quand il est affamé, lequel voulant sortir du bois pour aller à la proye, est tellemēt fuiuy des chiens, qu'ils le mettent tout en piéces. Il n'y a si petit, ny grand, qui n'aille contre luy: Tésmoins Maistre Guillaume, & ce Docteur de Sorbonne. Maistre Guillaume mon amy, parlant d'Angouleme, vous auez trop aperiement descouuert le pot aux roses. Laissez ces yurongneries, & parlez de boire: comme vn Suisse des gardes, qui beut dernièrement du vin grec, puis parloit ainsi à maistre Angouleme, *Africa d'on thyso thea, to flog' erot' Aphrodite*

tes fango plias, traumatis tui tromco.

Allez, ie vous donne cinq douzains, & paye chopine, s'il deuine cest Allemand: Que s'il l'eust entendu, il luy eusse peut-estre fait comme Ctesiphon à sa mule: La mule rnoit contre Ctesiphon, & Ctesiphon contre sa mule: Il y auoit bien du plaisir à voir ruer ces deux bestes, sans comparaison tourefois. Et combien que Messieurs de la Cour scauroient ses maquerellages; Estimez-vous qu'ils luy fissent danser les canaries, trotter la martingalle, ou balier la pauane? ils n'ont ja besoin de tel bruit au Palais: Car il y a des huissiers en la salle, lesquels crient comme de Diables, ou comme le Taureau Phalaris. Paix là, paix là, silence: allez causer dehors. Vous diriez que cest la boutique de Vulcan; que vous n'entendiez que battre l'enclume. Mais vous notterez icy, s'il vous plaist, que Angoulenent a plus fait de fruiet dans vne heure, que tous les Predicateurs de Paris dans vn an: Parce que plusieurs dorefnauant auront à bon escient peur de hurpeau. M^r Guillaume, Moyse vostre oncle, du quel vous faites mention, ie ne scay qui cest: toutesfois à mon aduis il ne porte point les cornes comme l'autre. Si est-ce qu'il scait bien conduire le peuple d'Israël: Dieu luy donne bonne vie & longue. Si Monsieur vostre bon amy tenoit l'estendue du pays que tenoit Charlemagne, personne ne disputeroit les titres; toutesfois il y a assez de temps de

depeindre les aigles en nos armoiries. Charlemagne fut bien Empereur. Je ne passe pas plus auant, car ie n'entends point tels affaires. Le recit de Moyse vostre oncle, semble qu'il vueille dire que ces Messieurs vieux guerriers, & maistres és arts en l'escole de Mars, se doiuent reposer, & enseigner au College de Cambray publiquement la methode qu'il faut tenir en la guerre; & les autres qui n'y furent iamais, qu'ils les aillent entendre. Et puis quand il sera besoin frapper à dextre, & à fenestre, & seruir bien son Roy, en secourant la France: Je n'entends autrement ce passage. Touchant Messieurs de la Cour, ils me feroient vn grand plaisir de corriger vn peu ces textes, chapitres, digestes, paragraphes, codes des substitutions, & que le Roy mesme y mist ordre; dorenavant on ne sçaura rien acheter de liquide. On m'a ja despouillé d'une mettairie que j'auois acheptée, presque tout mon argent y est demeuré. Je requiers dōc à la Cour, comme aduocat des pauvres, que pour le moins l'argent despensé soit rendu. Et par ainsi, à mon aduis, il n'y aura point d'iniustice. Je ne m'estonne pas de celuy qui crioit viue la guerre, puis qu'il ayroit fort les bonnes & grasses soupes à l'hyssope. Et nostre Soldat, pourquoy veut-il la guerre, que pour manger à son saoul? Combien en y a-il maintenant qui desrobent les gelliniers des mettairies. Il y a enuiron vn an qu'on me desroba

sept chappons, & treize poulles. Ma pauvre femme en pensa mourir de douleur. Ce n'estoient pas les Renards, ne les Martres des bois, mais bien les Renards des villes, jadis gens d'armes. Maistre Guillaume, quand vous parlez du Jubilé d'Orleans, vous me faites souuenir qu'un Catholique demanda à un d'une autre religion en ce temps-là, vostre maistre quand ordonnera-il son Jubilé? O dit-il, il nous met tous chauffer, & tous vestus en Paradis. Le Catholique respond, Dieu a les clefs du Ciel, le Pape celles de la terre, & vostre maison ne peut auoir que celles d'Enfer. L'autre respond, s'il a celles de l'Enfer, ce sera pour vous y enfermer. Le Catholique repliche: Courage il sera donc le portier. Ces disputes ne me plairoient pas, Maistre Guillaume, ie voudrois que nous fussions tous gens de bien. Vostre discours suiuant, ie ne sçay si ce sont symboles, diabolos, ou paraboles, ou emblemes, ou griffes, ou enigmes; ie n'y entend rien du tout, & sur tout de vos guerres. En ce temps ie m'en fuis en Italie, pour garder mon petit *Suppositum*, tant i'auois en haine la guerre. Si Pichery mourut és baings, mourut peut-estre de faim, mais non pas de soif: il faudroit mettre sur son tombeau, *nul ne s'y frotte*. Maistre Guillaume mon amy, en ce passage d'Alexandre vous estes un Rethoricien, grand de cinq picques. Je consents à vostre dire. Plus, calculez ses victoi-

res, & rabbatez ses ans, vous trouuerez qu'il
vesquit autant en guerre que Mathusalem.
Mon amy, pourquoy conseillez-vous au
Soldat d'aller à cheual en Espagne? Il seroit
meilleur qu'il y allast par mer dans vne bõ-
ne Galere, bien ferré comme les autres. La
fin commença mal, & finit mal. La mort
vit tousiours, la vie meurt tousiours. C'est
le cours des hommes: gare la meche qui
voudra.

*La paste mort d'un pied esgal,
Les boutiques des pauvres pousse,
Ainsi que le Palais Royal.*

Je suis encore de vostre aduis, que le Soldat
veut faire la guerre pour bien remplir ses
boyaux: Il meurt de faim peut estre. Ha le fin
renard! il a la faim de Midas. Or sus passons
outre, il n'y a point de comparaison, de Pom-
pée avec Monsieur nostre bon Roy, à qui
Dieu donne bonne vie, & longue, & encor
quelques enfans massés. Il estoit vn peu trop
precipité, & indiscret; Car il disoit estre plus
necessaires d'aller par les tempestes, & ora-
ges de la Mer, que de viure. Qu'est-ce à dire
sinon qu'il estoit plus expedient de mourir,
que de viure. Et c'est ce que le Soldat veut
dire: Mais remarquez à qui il donne ce con-
seil. Le comparer avec Cesar, vade, lequel
auoit vne belle deuise, *festina lente*. Aussi fit-il
bien ses affaires. Quand vous parlez, Maistre
Guillaume, des comedies, & des Batteleurs,
vous parlez plus obscur que la nuit. Et peut

estre ne vous est-il pas besoin d'en parler à la chandelle. Or sus ie n'entends que ces deux mots d'Italien, que dit Harlequin, *Qui ben sta non si muoue*. Vous y auez oublié ce que peut-estre dit Pantalon,

Vn bel morire tutta la vitta honora.

Sur tout en Greues ou à la Bastille, & Zani que disoit-il à cela?

Vn buon fuggire tutta la vitta scampa.

En Hongrie donc, tesmoin celuy qui apprend l'Allemand, & ceux qu'on void effigiez par les fourches de Paris. Demandez leur en vn peu de nouvelles. Ma foy telles gens ont tousiours mauuais temps. Gare Guinel, & Cheualier s'ils sont rien embrenez, y a assez d'eau en la Seine pour les lauer. Si leur Ad-uocat prend tousiours la cause en sa main comme il a fait, ils pourront encores faire vn ballet, ou vne tragicomedie à ce Carefme-prenant. Gare la meche: Maistre Guillaume mon amy, si Monsieur vostre bon amy vous croioit, il faudroit bien tost tailler telles racines, puis les mettre au feu, de peur qu'elles ne reiectent: pareillement toutes mauuaises sortes de grains, de peur qu'ils ne suffoquent le bon: l'on dit, ie n'en scay rien: toutefois que quelqu'un s'est peruertý à tour de banderolle, mais le desir de iouer des instrumens fera prou moines, organistes. Ce sera la lie du peuple d'Israel, allez en demander les nouvelles au lac Lemau, les placarts y sont affigez par tout. A Montauban y en va tant

de teils pelerins pour voir l'escarboucle d'or
 de Renaud de Montauban. Bref c'est grand
 cas. Mais Dieu donne bonne vie & longue
 à nostre bon Roy, & à Monseigneur le Dau-
 phin : son pauvre Dauphiné, voire toute la
 France a bien besoin de reformation. Car
 presque les plus ignorans ont les meilleurs
 benefices, parce que pour vn couple d'escus
 on est Bachelier. Il ne faudroit que par tout
 de bons colleges de Iesuites, & puis les as-
 nes deviendroient hommes. Je ne touche
 personne, quant à moy ie ne suis point ambi-
 tieux d'affaires d'Eglise; cōme ie vous ay dit,
 ie suis marié, & ne puis & ne veux estre pre-
 stre pour encores ny pour iamais : si nostre
 femme venoit à mourir nous y penserions;
 pour mes enfans ie n'en ay que deux, & ne
 leur vetix point procurer de benefices, mais
 pour maintenant de bons offices, afin qu'ils
 seruent bien Dieu, & le Roy, aiment la paix,
 viuent & meurent en gens de bien. Je re-
 prens mon discours, Iupiter Ferrier *suada
 medulla*, passe Cheualiers de l'Ordre telles
 gens. A propos il triompha vne fois si bien,
 voulant prouuer que le Pape estoit l'Ante-
 christ (comme ont conclu la vers Die, ou
 Gap trois cens Diacres) ie crois qu'on eust
 mieux prouué que la ministresse faisoit por-
 ter les cornes à ce bel Adonis. Si Messieurs
 les Nemausois eussent esté poussez du mes-
 me zele que les anciens Romains, on luy eust
 dressé vn arc triomphal à son retour de

Castres, & eussent faict exhiber des ieux à l'Amphitheatre, eussent faict refaire le temple de Diane, pour le consacrer à la belle Ariadne; puis eussent mis vne statue d'argille au bout de tour Magne; & le voila immortel, il ne luy manquerent pas lauriers, espèces nuës, & rameaux d'oliuiers à son entrée, vous eussiez dit que nostre Seigneur entroit en Hierusalem, il ne luy failloit plus qu'une asnesse, & vn asnichon. Si cela qu'il prouuoit eust esté vray, nous serions ià à la fin du monde. Il y a bien trois ans de cecy, & l'Antechrist ne doit regner que trois ans. Je ne sçay Maistre Guillaume si Monsieur nostre Sire a iamais sceu ce qu'on fit à Nismes au mesme temps: vn soir on fit eriger vne croix sur vn clocher, au lendemain vous eussiez dit que tous les badaux de Paris y estoient allez: & que ceux desquels Aristote faict vne supposition fortirent des cauernes de la terre à guise de potirons. Or sus on fit tout quant & quant des pasquins, ils furent affichez à la porte de l'Eglise, & de la maison de monsieur l'Euesque. Cependant que l'on disoit vespres, voila quatre vingts hommes ou diables, ennemis de la croix, armez de pied en cap, bon rondache au bras, & le coutelas au poing, pensez s'ils ne vouloient pas bien celebrer l'anniuersaire des vespres Cecilliennes, & remplir le puits vne autrefois: passons cela, c'est chose vieille, Dieu & nostre bon Roi facent qu'elle ne retournent plus. Quand
ce

ce galand crie courage, courage, prenons
 l'Espagne tout d'un coup: à cheual, à cheual,
 à la guerre, à la guerre. Il faict peut-estre
 cōme ces Soldats, lesquels firēt vne Cartha-
 ge de paste en sucre, avec du beurre; c'estoit
 vn grand gasteau; il y auoit des tours, des
 temples, des maisons: & pour bien desieuner
 ils rompirent tours & maisons: bref, ils rava-
 gerent le plus precieux, crians au pillage, au
 pillage. soldats, mais Scipion s'en fascha.
 Maistre Guillaume il vous eust falu faire ce-
 la ces iours des Rois passez avec le soldat,
 pour chercher la febue au gasteau, à la san-
 glante défaite de quelques coqs d'Inde, per-
 dris, chapōs, leuraux, avec du bon vin muscat
 de Frontignan: lors le vaillant soldat, qu'il en
 eust tué de morts, il eust trenché à dextre,
 à fenestre, deuant, derriere, haut & bas, du
 long & du large; ô qu'il eust bien faict iouier
 son cousteau, iusques à tant que le ventre lui
 fut creué. Je croy qu'en la bataille de Ceri-
 soles les chats n'y furent iamais si eschaufez,
 les renards n'y laisserent iamais tant du poil,
 & les loups n'y perdirent iamais tant de proye
 que Maistre Guillaume eust perdu de sa part
 en ce banquet. Que s'il eusse puis faict du fu-
 rieux, on l'eust peu attacher au collier de la
 place Maubert, ou le mettre dans vne cage
 de fer comme on faict à Geneue. Je vou-
 drois bien que messieurs les Medecins co-
 gneussent son humeur, il a la teste si chaude,
 qu'ils iugeroient qu'apres sa mort on l'a mis

dans vn alambic pour en tirer la quintessence, car on en feroit de bon huille de vitriol, lequel feroit fendre les pierres. Il vous semble Maistre Guillaume, que nous ne soyons plus propres pour la guerre. Monsieur de Rosny, Monsieur le Chancelier sont aussi prests que iamais, si elle estoit necessaire pour le bien de la France. Si la pluspart de nos braues Capitaines sont allez aux champs Elisiens, d'où ils n'en retourneront iamais, ou en Canadas (c'est bien autre voyage que celui de saint Iacques, ou de Hierusalem) nous en auons encores de la graine, elle croist par tous les quartiers de la France. Pleust à Dieu Maistre Guillaume, que monsieur vostre bon ami fust môté sur vne de ces aigles, lesquelles sont aux fossez du Louure, & vous sur l'autre, car nous apprendrions à parler grec. Quant à la prophetie, vous y obmettez vn zero, corrigez, c'est la faute de l'imprimeur, il y faut 10604. iusques en l'an 10605. en ce temps-là les dents ne nous feront plus mal, & nous aurons bien de l'aage. A celle du Duc de Sauoye manquoit vne corne à vn zero, au lieu de 1602. faut dire 1662. & quand ce temps sera venu aussi bien peut estre le Roy de France sera Duc de Sauoye, comme il le fut l'an 1602. toutefois Dieu maintienne tousiours leur bonne amitié, ie suis bien esbahy de la prophetie de Piculus Medecin d'Angers. l'an 1606. Bienheureux qui n'aura esté de iustice. Vous in-

terpretez fort bien Maistre Guillaume, si elle
 s'entend des chicaneur, peut-estre, que l'on
 en canonizera la pluspart, ie m'en rapporte à
 ce qui en sera, pour moy ie ne suis point chi-
 caneur, j'aime trop la paix. Vous qui sçavez
 ce que les Prophetes ont dict, ce que les
 Sibilles ont chanté, ce que les Fees ont cop-
 pté, & qui estes assis sur le trepied de la Si-
 bille de Delphes, où les Druides preschoiēt
 le tirefine au mesme temps qu'Appollon fai-
 soit l'amour aux Muses: pourquoy vous en
 seruez-vous pour faire la buée: par ma foy
 vous avez tort, si vous me l'eussiez presté,
 ie m'en fusse serui pour pronostiquer
 qu'il deuoit naistre vn monstre à Paris apres
 qu'il fut fait, & ie prognostiquerois les cho-
 ses merueilleuses à aduenir aussi bien que
 l'Astrologue de l'Empereur. Nous serions
 trestous de Phormions, à vouloir parler des
 affaires de la guerre à nostre Roy, le four-
 reau duquel vaut plus que l'espée d'Annibal.
 Ne sçait-il pas bien que le Soldat en guerre
 semble vne banderolle, verterolle, girouet-
 te, & pirouette, à tous vents, la Lune, vaga-
 bonde, le Mercure tousiours mobile, le flux
 & reflux de la Mer, vn Cameleon, & vn
 Protée? Si est-ce qu'il en a, & en auroit de
 tres-fideles. Ceux qui sont tant ambitieux
 rendent veritable le prouerbe Prouençal.
Chitout lou vouël, tout lou perde. Tescmoin feu
 Monsieur de Biron. Partant qu'vn chacun se
 contente. M. G. vous dittes que vous n'en-

rendez pas les paragraphes, ne les digestes,
 ne les codes. I'en voudrois seulement sçavoir
 tant que vous. Car encore que sois marié &
 chargé de 40. ans, & de famille, ne lairrois
 pourtant de passer Docteur à trauers comme
 les autres. Pensez vous que ou en temps de
 paix ou de guerre, les Messieurs se soucient
 gueres de bonnetades? Nenny. Parce que
 l'homme ne se repait point seulement de tel
 pain, il feroit plus de conte d'un gras cha-
 pon. Pour Messieurs de l'Eglise n'ont qu'af-
 faire de guerre, ils prient que la paix dure
 tousiours: Moyennant qu'ils ne fassent com-
 me un pauvre ignorant, lequel estant prié
 dire vne Messe, afin que Dieu nous tlargit le
 beau temps, trouua le tiltre *pro tempore belli*,
 & dit cecy est mon cas. Voyla comme il pria
 pour la guerre. Hé mon Dieu! M. Guil. ne
 pourrions-nous pas auoir quelque miniere
 d'or en France, pour ne laisser corrompre
 tant de braues subiets. A la verité ie ne sçay
 à quoy on pense se tenir aux promesses du
 Roy d'Espagne, puis que tant de braues Fran-
 çois se perdent pour son or. Le nœud de la
 ligue est rompu Dieu mercy, moyennant que
 les Anticatholiques s'entretiennent dās leurs
 peaux. Nos Prestres diront encores pour
 eux, *Requiescant in pace*, quand ils mourront.
 Que Monsieur le Roy d'Espagne soit pau-
 vre, ie ne l'ay iamais veu demander l'aumos-
 ne. Qu'il n'aye besoin du bled, du vin de
 France, & de plusieurs autres commoditez,

Il le sçait. Qu'il ne s'oblige quelquefois au Geneuois, si fait. Il est bon marchand, il trafique sur la Mer, il fait faire des voyages és Indes. Voila comme il gagne sa vie. Il n'a autre mestier que celuy là. Tantost il perd, tantost il gagne. Quoy que ce soit il a tousiours quelques pensionnaires, qui ont fait, & feront la fin de la fin. Dieu nous garde de telles harpies. Monsieur le Côte d'Au-
 uiergne, & le Baron de Lus, ont-ils point de regret? S'il est vray ce qu'on en murmure. Ils ont maintenant bon loysir d'apprendre le *Confiteor*, & le *mea culpa*. Maistre Iean Rousseau, c'est vn habile tailleur. Sa renommée a volé insques au centre de l'Enfer. Il a seruy de tailleur à tous ces grands heros du Royaume de Pluton. Soldat prends-toy garde qu'il ne te prenne la mesure d'vn pœurpoint, avec du parchemin des cordiers pour aller faire la guerre en ce Royaume là, avec tes complices. M. Guil. mon amy, le conseil que vous donnez à Monsieur vostre bon amy est fort bon, & i'y reconnois quelque mystere. Il me souuient qu'estant ieune enfant en nos cartiers de Picardie, nous iouions à vn ieu, où il y auoit vn, lequel cherchoit tous les autres, qui s'estoient cachez. Il y auoit vne limite; lors qu'il auoit descouuert quel-
 qu'vn d'iceux, s'enfuyoit vers ladite limite, & disoit ie touche pour toy: s'il estoit esloigné de la limite, venoit à estre pris; lors ou il falloit qu'il portast tous les autres, ou qu'il

fut bien battu à coup de toques. O le pauvre enfant, on le faisoit trotter pour trouver ses compagnons, & ses compagnons le prenoient, & le battoient. Et le dernier estoit puis le premier à faire le mesme office. Si Monsieur nostre bon amy estoit ja party pour aller en la Natuarre, peut-estre que la Seine se troubleroit, & ces Messieurs, qui orient allons, allons, aux armes, à la guerre, voudroient pescher des carpes. Quand vous parlez M. Guillaume de messieurs les Marefchaux de France, de saint André, & de Rais, vous estes clair en ce passage, comme vn racle cheminée. Partant ne m'y arresteray point, craignans de devenir More. Que vous n'ayez besoin d'un sayon, si-avez. Mais au lieu d'y mettre vne piece par derriere, il eusse fallu y mettre vn fer bien chaud, avec d'estain pour soulder le trou, comme on fait és pots cassez. M. Guil. Si vous continuez à dire de sept Pseaumes, avec le *Reminiscais*, & que vous mettiez les gens en Paradis, vous gagnerez plus d'argent en vn iour, que tous les pauvres Curez de village, de France en vn an. Parce que tous ceux qui meurent sans estre bons Chrestiens, & bons Catholiques, & avec peché mortel (comme enseignent Messieurs de la Sorbonne) vont en Enfer à trestous les Diabes. Vous fut dit M. Guillaume que les Roys, & les Roynes auoient vn Royaume à part. En ce monde, ce'a peut estre vray: mais en l'autre on y est pesle &

meille. Au Royaume que i'entends n'y a pas tant de fausse que par les rues de Paris. Partant n'est besoin s'y decrotter. Je ne m'estonne pas si Giury vous fait tant de caresses, il est vostre amy, tout le monde vous ayme. Voila pourquoy auez tousiours grande suite. Je ne voudrois que l'on vous porta point d'enuie, ne à Renardiere, ne à Angouleuent pour escumer les Marmites. Mais que vous ne les deuoriez c'est assez. Giury fut trop euriex à vous demander tant d'affaires. Si on faisoit tant de questions à ceux qui veulent passer Docteurs, & que Diable seroit-ce? nous n'en verrions ia tant au Palais. Ces questions que l'on vous fit sont declarations de conceptions. Il y a bien à philosopher là dessus pour le futur, s'informer si Monsieur le Comte de Soissons est en Cour bien souuent? Si Monsieur le Prince de Conty luy a resigné le soin de ses affaires? Quelle opinion à la Rochelle de Monsieur le Prince de Condé? de la santé de Monsieur de Montpensier? des desseins de Monsieur le Comte d'Auuergne? Si Monsieur de Vandomé espouseroit mademoiselle de Mercœur? & si madame de Mercœur se feroit Capuchine? Il alloit trop auât, vouloit scauoir les affaires de Monsieur le Duc de mayenne, de Monsieur de Guise, & de son frere, de Monsieur de Neuers, de Monsieur le Connestable, de Monsieur de Bouillon, de Monsieur de la Trimouille, d'Espernon, de madame de Bar, & de son mary,

des Marefchaux, des Secretaires, de Monsieur de Rosny, & d'une longue liste que vous avez décrit. Plus, à quel propos se mesloit Giury, des amours de monsieur de Thermes ? ne du retour des Iesuites ? Que pensez vous M. Guil. si on pouuoit fricasser a pleine poëlle, que nous verrions de ballades ce Carefme-prenant. On se fasche fort que les reuerends Peres Cotton, Gontier, & Portugais, soient venus en ceste ville : Parce qu'ils ont ja tellement reformé les meurs, & les consciences, qu'on ne verra plus tant de desordres. Et certes il est vray. Car Paris estoit ja Sodome & Gomorrhe. messieurs de la Sorbonne, n'en foyez pas marris. mais corrigez ce verset, s'il vous plait,

Cens bitogata quidem nostris inimica cathedra.
Et mettez *Peramisa*. Pour dire le vray vos disputes sont si froides, que vous auriez besoin d'un poëlle, ou d'un hypocauste d'Allemagne pour le tenir au milieu de vostre salle. Qu'on laisse faire au Roy, il fait prou bien leur affaires. Toutes & quantefois que ie passe pardeuant le Palais, ie regarde si on ne commence encores à abbattre ceste colonne. Si elle estoit abbatuë, il y auroit moyen de faire quelque vn Bourgeois de Paris en ceste place. Hé Sire donnez la moy, ou vous Messieurs de la Cour, i'en tireray quelque rente pour entretenir vn cheual à Paris, de ceux qui font là des aiguilles ou des peignes. Pour leurs liures, & le reste de la confisca-

tion, les cas de conscience enseignent la reigle de restitution sous griesues peines, d'avantage le mal acquis faict mauvaïse fin. La Religieuse de Poissi m'excusera s'il luy plaist, elle eust mieux fait de demander, vend-on point le desirant traduit d'Italien en François? ou Jean Gerson? lequel est suffisant pour la redre aussi sainte, que sainte Catherine de Sienné. Dieu luy face la grace, de la bien imiter. M. Guillaume, vous touchez vne bõne corde, quand vous dittes, si les François se voudroient resoudre à la racine, & à l'eau, comme l'Espagnol, lequel a fait le circuit du monde. Dieu sçait s'il a eu tousiours du rosti & du chapon, ou mesme biscuit. Nostre Soldat, lequel n'aime qu'à faire bonne chere, comment voudroit-il faire telle vie? Je crois qu'il feroit comme les cloches. Quand il crie à la guerre, orsus, hola, hola, allons, allons, compagnons les cloches appellent les gens pour aller à la Messe. Mais elles n'y vont jamais. Gardez-vous bien partant de faire cest Enthymeme Maistre Guillaume: car il s'agiroit de vostre reputation, & beaucoup plus de l'honneur de vostre Soldat. Le François n'est pas si patient en guerre que l'Espagnol: doncques il n'est pas si vaillant que l'Espagnol. Si cela estoit, nous entendrions trop de *Vallos mi Dios, Vello mi Dios Lutheranos Franceses*. Ainsi parlent-ils. Et pourquoy? pensez-vous qu'ils sont si animez contre nous: parce qu'ils se persuadent que nous

sommes tous Rochelois. De vray l'aage de
 nostre bon Roy, à qui Dieu donne bonne vie
 & longue (ne vous estonnez pas si ie repete
 ce mot, parce que i'aime mon Roy, & la paix
 infiniment) ne celuy de son fils se doiuent
 maintenant occuper à la guerre. Vous ap-
 portez de bonnes raisons. Si nostre bon Roy
 ne l'auoit iamais veue, n'auoit iamais manié
 lance, ne cimetiere, tu aurois quelque raison
 Soldat. Mais il n'a iamais fait autre chose du-
 rant sa vie. Et comme tu dis il n'eut pas si tost
 l'espée au costé pour la bien-seance, qu'il
 l'eut au poing pour combattre ses ennemis.
 Ne sçais-tu pas que Luculle se retira en ses
 viuiers apres tant de victoires. Luce Quinte
 ayant fait vne si glorieuse defaite, s'en retour-
 na accoupler les bœufs, & conduire sa char-
 rue. Nostre bon Roy est tout plein d'expe-
 rience de Mars, & tu le veux enseigner. Les
 Grecs tiennent comme reigle de droit, qu'il
 ne faut rien entreprendre, qu'on ne puisse
 mener à bonne fin. Si tu fusses esté vn peu plus
 aduise, tu eusses fait comme Isocrate, lequel
 employa dix ans à faire vn seul Panegyrique,
 & Cynne neuf ans à son Smyrne. Il est vray
 que vous esties remply de furie, laquelle vous
 auez ietté hors comme vn canon le maillet.
 Iadis y auoit vn bon pere de famille, lequel
 auoit trois enfans, l'vn Orateur, l'autre Phi-
 losophe, & le tiers estoit Medecin. Le bien
 fut diuisé en quatre parts. Il laissa par testa-
 ment, que la quatriesme seroit à celuy qui se-

roit plus vtile, & seruiable à la republique. Il y auoit bien à disputer là dessus. Mais en vous Soldat nenny. Car il vous eut fallu donner la part qu'eut Neuie, ce fut la seule liberté pour tout son heritage. M. Guillau. pour le reste il semble que vous estes enroué, on ne vous peut entendre. C'est trop moralizé, suiuous nostre train. Si le Soldat vous appelle comique & maigre bouffon: dittes-luy qu'il est homme de trois lettres, non pas *Rex*, mais ce qu'on entend communément. Et bouffonnaat en ceste sorte, vous direz peut estre tousiours la verité. Pour les tiltres de Monsieur le Roy d'Espagne c'est peu de fait. Je voudrois qu'il les eut seulement, & moy les reuenus. Je luy en ferois tousiours vne descharge par main de Notaire. Vous auez bien du credit Maître Guillaume, puis que vous parlez au Pape. Ia Dieu ne plaïse que tous les Huguenots se fussent trouuez dans Ostande: Car il n'y en eut pas eu vn seul, lequel eusse porté les nouuelles en Paradis. Les Espagnols sont si cruels qu'on les suit en Paradis, en Purgatoire, en Enfer, & en ce monde. Si que (comme i'ay leu auant-hier là au Palais en vn image) faisans brusler vn pauvre Indié, vn pere Cordelier l'exhortant à bien mourir, & en bon Chrestien pour aller au Ciel, l'Indien dit: Et comment, les Espagnols vont-ils en Paradis? Ouy respond le pere Cordelier, s'ils viuent & meurent en bons Chrestiens. Ah! dict-il, ie n'y veux doncques aller: J'ayme mieux aller

en enfer. Certes on en eut canonizé plusieurs
 de ses messieurs. Les lōgues litanies qu'on en
 en eust fait pour la multitude des Martyrs,
 comme est celuy lequel fut pendu dernière-
 ment en ceste ville, il chantoit les Pseaumes.
 On eust peu chanter en Allemagne, *A Dia-*
lectica Canisii, & à Paris à *Disputatione d'E-*
ureux, Libera nos Domine, vers la Guienne &
 vers Bordeaux *Ab eloquentia Richeome*, &
 presque par toute la Frâce, *Arctibus P. Cotio-*
ni, & à *Theologia Bellarmini, Libera nos Domi-*
ne, & par dessus, *Te rogamus audi nos*. Apres fai-
 re chanter au Choristes & Symphoniaques
 pucelles le Cantique des Cantiques. Car
 eux, & elles aiment bien à se marier, aiment
 bien aussi tels discours. Je ne sçay s'ils feront
 mieux que le docte Genebrard de bonne me-
 moire, lumiere de nostre siecle, qu'il a si bien
 traduit. Maistre Guillaume, que le Pape aye
 procuré la Paix, cela est plus que vray. Tous
 ceux de sa ligue la procurent aussi: mais qu'il
 l'aye faite pour ses decimes, ne croyez pas
 cela, il sçait bien qu'il ne les emportera pas
 en l'autre monde. Tout apres, vous m'avez
 descouvert vn grand mistere, quand vous
 renuoyez le Soldat en Flandres. Qu'il aille
 hardiment ayder au Comte Maurice, là où il
 fera la guerre contre l'Espagnol, & verra s'il
 est vne gruë. Puis qu'il desire faire la guerre
 contre l'Espagnol, qu'il face vn peu leuée de
 ses compagnons de mesme estoffe, & de
 mesme casaque à ses despens, non pas à ceux

de nostre Roy, cependant nous luy aprestons vne couronne de laine, & vn sceptre de bois, comme ou faisoit au temps passé, avec vn Royaume en belle peinture: & apres la mort nous crierons viue le Soldat. Et dansera vne gaillarde au son des cimbales, & des sonnettes du Diable, s'il la veut apprendre cependant: puis qu'il ne fait la guerre, qu'il aille delà le pont S. Michel aupres de saint Seuerin, où trouuera vn Zani, lequel lui enseignera fort bien à danser avec les sonnettes au pied, & vn petit tambour tout entouré de sonnettes. Il a bien si bonne grace avec son faux visage, qu'il semble vn de ceux qui vont au Sabbath du Diable, ou vne des Bacchides. Entendons-nous sans faire digression. Car si tu veux faire la guerre contre l'Espagnol, autant te la vaut-il faire en Flandres, qu'en Nauarre. Tu responds que non, & qu'il la faudroit r'auoir. T'appartient-elle? laissez en penser à qui touche. Tu deviendras maigre Soldat, parce que tu te donnes trop de peine des affaires d'autrui. Il y a de l'intelligence en ton fait, & plus que ie n'en pense, & que ie n'en scaurois dire. Nostre bon Sire y pensera, cherchât tousiours l'amour de Dieu, & le bien de son peuple, & non pas celuy du Soldat. C'est le meilleur chercher le bien public que le particulier. Ie ne veux pas dire pour cela qu'il faille perdre ses biens.

Ceux qui ont changé le *Per omnia*, & corrigé le *Magnificat*, comme dit M. Guil, on fait

bône pesche en eau trouble. Lors que nostre bon & tres-cher Roy estoit occupé par ses cartiers de Picardie: Demandez à Monsieur le Duc d'Vsez, combien il luy fut présenté par vn ministre s'il eusse voulu broüiller les cartes. Les ergots cornuts ont veritablement engendré vn Atheisme. Ceux qui sont perscrutateurs de la Majesté, seront opprimez de la gloire. Je cite la Sainte Escriture: Car i'ay presché vn an pour sept Caresmes, à l'Eglise de l'Hostel Dieu de nostre Dame. Oû preschoit dernièrement quelque Docteur de Sorbonne. Son theme estoit, que nostre Seigneur estoit allé au Temple, & fut trouué au milieu des Docteurs. Il crioit bien si fort, & y alloit d'vne telle ardeur, qu'on eusse dit qu'il preschoit à l'Italienne. Et dit, où pensez vous trouuer Dieu? sinon au Temple? Et pourquoy pensez vous que tant de Religieux entrent és Monasteres? quoy? pensez-vous qu'ils soient plus volleurs, ou larrons que les autres? & moy à fuir. Car ie ne fus iamais larron, ne volleur en ma vie, fors de vertus & bonnes mœurs. Sinon que ie desrobba vne fois vn couple de douzains à Madame ma mere: d'où i'en fus si bien estrillé, qu'il m'en souuient encores. Il faut, pas moins, pardonner à cest homme de bien. Il auoit certes peché contre le precepte de Rhetorique, car il disoit *ex tempore*. Pourquoi ay-ie cité l'Escriture? parce qu'il y a d'hommes & de femmes, qui veulent plus sçauoir que maistre

moufche : n'estant pas capables d'entende-
 ment, ne veulent croire sinon ce qu'il leur
 semble probable. Vn bon, simple, & fidele
 Chrestien, & Catholique, captiuera son es-
 prit en l'obeissance de la foy (selon S. Paul).
 Je suis plus que Docteur de Sorbonne quand
 ie veux. Je parle comme les liures, & les lie-
 ures. Pas moins *Notate verba, & signate myste-
 ria*. Le pauvre & ignorant Charbonnier at-
 taqué de quelqu'un : Je ne sçay s'il estoit
 Vbiquetaire, Trinitaire, Lutherien, Calui-
 niste, Bezaïste, Arrien, Juif, mahoméran. Bref
 qui que ce fut, il dit: Comment? croyez-vous
 qu'il y aye vn purgatoire? C'estoit apres plu-
 sieurs disputes. Respond, ie crois qu'il y aye
 vn Paradis, vn Purgatoire & vn Enfer. Et
 qui ne crois ce Purgatoire & cest Enfer, il
 n'aura iamais le Paradis au Ciel de ce mon-
 de. Je le nie dit l'autre, & puis croyez-vous
 qu'il y aye vn autre monde? Le Charbonnier
 respond: Ouy ie crois donc vn autre monde
 & vn autre Paradis de par delà cestui-cy, à
 50000 lieues pour les bœufs, pour les asnes,
 pour les pourceaux, pour les renards, pour les
 mescroysans, & infideles & mauuais fidelles,
 lequel est fiché comme vn pieu parmy ces es-
 paces imaginaires. Allez-y donc mô maistre,
 & Dieu vous command. Voila comment ce
 pauvre ignorant gaigna sa cause. M. Guillau-
 me ce Soldat est bien mal aprins à parler; d'v-
 ser de nom de beste enuers vn Roy d'Espa-
 gne. Je crois que s'il auoit la bourse bien

fournie, & fut vn peu esleué, il se seruiroit de sa langue aussi mal enuers nostre bon Roy, que feu monsieur le Marechal. Tay-toy pendard larron. Tu veux mesurer tout le monde à tō aulne: Tu appelles beste vn Roy d'Espagne, parce que tu l'es. Tu veux remplir nostre Roy de furie, parce que tu es vn insensé. Tu appelles goetreux, bossu, & pigmée le Duc de Sauoye. Maistre Guillaume te voudroit bien cognoistre, & voire vne seule fois, il a estudié en Physiognomie. Ie m'asseure qu'il te dechiffreroit bien. As-tu esté bien sage de reprendre les edifices, la chasse, & le repos de nostre bon Roy? que t'ont-ils fait messieurs les Iesuites? Et puis tu feins le Catholique. Remarquez vn peu ie vous prie quand il parle du Pape & du Clergé, pour faire fournir deniers: il fait comme les cheures, il ne sçait faire que ronger. S'il m'en croioit il se feroit homme de bien, & s'en iroit au Pape contrit de sa faute pour auoir l'absolution. Qu'il s'en alla apres ietter dans vn Hermitage ou Monastere à faire penitence. Car gare sa peau s'il est recognu. Il le faudroit vne fois enuoyer en ambassade au Roy d'Espagne, pour voir s'il feroit point tif & taf comme le cordonnier, & si on feroit point d'esguilletes de sa peau; il n'auroit ja besoin ne de tesmoin, ne de Notaires, & cognoistroit si le Roy est sans Conseil. Qui sont ceux qui peuvent murmurer contre les Iesuites, fors les loups, qui ne veulent en-

rendre abbayer les chiens: Il ne sont point Espagnols, il y en peut auoir de toute nation, fors de Mores, parce qu'ils semblent de Diabls: conte Soldat, combien tu en vois à Paris de Iesuistes Espagnols: & combien qu'il y en auroit, ce seroit pour s'employer corps & ame pour le seruice du Roy, de la Roine, du public & du priué, lors qu'ils en seroient trouuez capables. Tu n'as pas tant en haine la nation, que la religiõ. Car on doit penser que tu veux aller cõquister l'Espagne, pour te faire Espagnol. Et pas moins tu cries contre les Espagnols. Mais tu diras peut estre que ie suis espagnol. Sauf correction, tu en aurois menty messire. Je ne le fus iamais, ne de nom, ne de fait, ne de conception. Je suis naturel François, loyal tout ce qu'il se peut, amateur de la paix, & aussi prest à seruir mon Roy, que piece de la Cour. Je suis mediotre Gentil-homme, & suis tout prest à seruir mon cartier au Roy. Au reste ie ne diray ne mon nom, ne mon pais. Le Roy, & la Roine le sçauront quand bon leur semblera. Mais ie vous prie Soldat dites vn peu le vostre, pour sçauoir quel aage vous auez. Maistre Guillaume quand vous parlez de la liberté de conscience, elle est la porte d'Enfer, c'est à dire quand on vit mal. Maistre Guillaume, il n'i auroit ja tant de peine comme vous pensez pour faire la guerre. Nostre Roi seroit aussi prompt que iamais, s'il voioit qu'elle fus necessaire. Bien est vray qu'il y a

quelque sorte de gens, de la mesme cōfrairie que le Soldat, lesquels interrogez: Le Roi est il en bon portement; comment lui va? Respondent, il est ja vieux, il ne viura plus gueres. Dieu vous garde Sire, & nous aussi de tels prophetes. Car iamaïs les guerres ciuiles ne feroient plus chaudes qu'alors. Il y en a peut estre plusieurs, qui n'attendent autre chose, mais Dieu les prie de telles esperances. Dieu vous benie, Dieu vous maintienne, & vous face viure longuement contre tous leur desseins. Monsieur de Rosni encores feroit plus de merueilles que iamaïs s'il failloit ouvrir les portes de *Iannus*. Pleust à Dieu que ie me fusse trouué à Paris, quand on cria celui qui auoit blessé le Pere Cotton, car i'eusse tasché faire gagner à vn de mes seruiteurs les deux mil escus. Et en fin que sera ceci? on ne voudra laisser viure ne le Roi, ne ceux qu'il aime. C'est à la verité trop de liberté qu'on s'vsurpe. Le bon Moïse compatissant à son cousin, il prenoit trop de peine pour escrire à Arnaud, & à Pasquier. Ils ne se peuuent ja donner deux fois au Diable: c'est bien assez d'vne; ni mesme s'en aliener; ce qu'ils prouueront fort bien par leur loix, *titulo de donationibus*. Il y a enuiron quatre ans, que ie pensois qu'Arnaud fut mort, ie dis, ou Dieu ne m'aide iamaïs, vn *Deprofundis* pour lui, afin qu'il vesquit longuement en l'autre monde. Le Soldat fait mention d'vn Arnaud, ie ne scay si c'est cestui-ci, & d'vn

Dolé en ceste maniere. Ces deux Dires d'Acheron, ces deux merles blancs, ces deux parois blanchies, ces deux marmitons de Pingare, ces deux grands ioueurs de la harpe à griffes. Vn de mes nepueux estant escolier à Tolose, m'enuoya ces deux vers dans vne lettre, qu'vn sien condisciple fit iouant à la paulme.

Vatibus Ascerais cedit philomela canendo

Arnaudo auriloquo, mer Doletoque patronis.

Ie ne suis pas fidelle rapporteur de ces vers, d'autant que i'honnore gens de Iustice, car au lieu de *Ascerais* il y auoit *Arcadicis*, & apres *Arnaudo* y auoit *Oinophilo*. Ce que ie raya tout quant & quant. Pour moy ie crois que ce ieune homme imitoit les Grecs, qui mettent *tis, de, cai, ge, men*, pour distinctions expletives. Et a changé *n*, en *r*, comme on fait par ces cartiers. Ou dictes que c'est vne cheuille, Maistre Guillaume: il semble que vous voulez estre Iesuite, ainsi prenez leur cause en main. Disant que ç'a esté le bon plaisir du Roy, signé HENRY, de Neufuille, le Visa du Chancelier, le seau, la fleche, le futur plus ample reestablissement, la bonne affection que leur porte nostre bon Roy, Graciane & vous: Mais vous vous tromperiez, penser que Monsieur le Dauphin fut Iesuite. Iarnais Iesuite ne portera robbe fleurdelizée, ne Couronne d'Or en teste, ne Sceptre en main. Il le pourra biē estre en meurs, religion, maniere de viure. Car selon qu'on

m'a dit, il n'y a gens au monde qui tiennent meilleure œconomie, police, & ordre en toutes leur actions, que font les Iesuites. Si ma femme, & ma santé le permettoient, ie voudrois viure à leur mode. Voila pourquoy le Pere Gontier est tant aimé, & les escrits du Pere Richeome tant chers; & la Messe du Pere Cotton si attentiuement & deuottement entendue. Ayez vn peu de patience. Maistre Guillaume, vous vous hastez trop. Nostre Seigneur commença seulement de prescher à trente ans. Je ne sçay que dire à la suite de vostre discours il est assez clair. Mais vous vous faites tort, si vous ne procurez d'auoir vos lettres de Notaire. Car vous entendez bien la forme de coucher vn contract. Il est possible, que tout ce que vous dites, se face. Parquoy nous n'aurons besoin du conseil du Soldat, ne de guerre. Les affaires iront mieux en ceste façon qu'autrement. Apres ce mariage, & restitutions des droicts François, on pourra faire vne autre loy Salique, par laquelle sera ordonné que iamais le bien de France ne s'alienera en aucune façon que ce soit. Et par ainsi elle se conseruera en son entier, & chacun se portera bien, & moy aussi. Adieu Lecteur.

Ne crois Lecteur, qu'en cest escrit
 Soit l'image de mon esprit,
 Et si tu crois que ie bouffonne,
 Au moins ie ne blesse personne,
 Mais crois plustost que tels bouffons
 Sont de l'humeur des Xenophons.

*Quod si dente magis mordear inuido,
 Aut quis me Satyris vatibus inferat,
 Ostendam lepidò carmine cornua.*

F I N.

75
[Faint, illegible text in a single column, possibly a list or a short narrative.]

[Faint, illegible text in a single column, continuing the list or narrative.]

[Faint, illegible text, possibly a signature or a date.]











